

## **Männerleid**

D'Männer, so liest me, seiet sauer  
allmählich auf dia Frauepower,  
dia ne ihr Selbschtachtung bloß nähm  
und sia in ihrem Mannsei lähm!

So fühlt sich manche als verkannde  
Ausbund an U'schuld missverstande  
und moint, es würd ja allweil schlimmer  
mit dene junge Frauezimmer;  
dia seiet jô so a'spruchsvoll  
und traimtet bloß vom me Apoll:

Von oim mit Geld und Renommée,  
me Haus und dickem BMW...

...von oim mit Subber-Frauekenntnis,  
mit Zartgefühl und mit viel Verständnis,  
der it auf Luschterfüllung pocht,  
sondern au eikaufft, butzt und kocht...

...der an de Kennelern-Dag denkt  
und all zwoi Woche Rose schenkt...

...von oim, der dapfer widerschtôht  
wenn oine ihm an d'Wäsche gôht...

...von oim, der it fünf Woize trinkt  
und gaga spät ins Bett neisinkt,  
ohne sich bloß en Hauch zua schäme...

...in summa: halt von oim zum zähme,  
um em denn auf em Kopf rumz'danze.  
Oh, gang m'r weg mit de Emanze!!

Klar, wenn m's aus DER Ecke sieht,  
verschtôht me fascht des Klage lied.  
Für gschtandne Kerle aber gild  
a völlig anders Frauebild:

Schee, jung und knackig sodd se sei,  
und tolerant no obedrei,  
dia it glei mault, dass'es re stinkt,  
wenn er môl schnell sechs Woize trinkt...

...oine, dia it glei G'sicht verziaht,  
wenn er spät hoimkommt, bsoffe-müad...

...oine, dia em in so re Nacht  
liebepoll kalte Umschläg macht  
und en, anstatt se eisig mauret,  
wenn's em speiübel isch, bedauret...

...oine, dia über d'Witz no lacht,  
dia, 'r scho hundert Môl hôt gmacht...

...oine, dia beim A'näh'rungscheck  
it bellt, nimm deine Pfote wegg,  
kurzum, des isch bloß recht und billig:

A Frau - hübsch, sprachgehemmt und willig.  
Dees wär's. - wenn sich des mache ließ,  
hett' 'r s'reinscht Männerparadies.

Klar, Buabele, des wär it schlecht,  
doch s'Lebe, gell, isch u'gerecht!  
Wo gibbt's no so was heitzuadag?  
Drum horchet, was i eich jetzt sag:

A seddigs Wese, engelsgleich,  
wär unterm Strich gar nix für eich,  
weil ohne Maule, ohne Krach,  
dô däted ihr im Schlôfgemach  
samt me womöglich deire Balle  
stumpfsinnig bloß ins Bett neifalle  
und wüsstet it, promilleblind,  
ob ihr dô au im reachte sind.

Schimpft aber s'Weibi, dämmerts oim:  
Jawoll, jetzt bin i echt dehoim!